

BATAKURU PUULUSA HAA E

‘BE GALAASI ‘BEN

1 ¹Immorde e an min Puulusa, oo *sahaabaajo, mo tawata hinaa yimbe ben toddii dun, hinaa kadi e hay gooto dun rewi si hinaa e Iisaa Almasiihu on e Alla Baabaajo on, on Immintindo mo e hakkunde maybe ben, ²wondude e musibbe be mi wondi ben fow, haa e mon onon ngal *moftal Iisaa wongal Galaasi.

³ Yo moyyere e buttu wonan on immorde e Alla Baaba men, e Iisaa Almasiihu Joomi on, ⁴on ittudo hoore mun sadaka fii junuubaaji men din fii dandugol en e nguu jamaanu bonngu fewndiingu hande, wano Alla Baaba men hoddiri non, ⁵on mo mangural wonani haa poomaa. Aamiina!

Fii Kibaaru Moyyo Bajjo on

⁶ Mido ɻaldí fii koo ko yaawudon yiltaade e baawo oo Noddirdo on moyyere Iisaa Almasiihu on, haa ka yahanon kibaaru goo. ⁷Hara-le kibaaru goo alaa, kono yimbe goo no woodi wonbe on jiibude, faalaabe boylude *Linjiila^a Almasiihu on.

⁸Kono hay si ko menen maa malaa'ikaajo iwrudo ka kammu fejjinani on kibaaru goo sertudo e oya kibaaru mo men fejjinannoo on, yo o malkise. ⁹Hari men yeetinoke on dun ado hande, mido fillitaade kadi: si goddo fejjinanii on kibaaru sertudo e oo mo hendinodon, yo o malkise.

¹⁰E jooni non, hara ko teddungal yimbe ben mi woni dabbude, kaa ko iwrungal ka Alla ngal? Kaa hara mido dabbude no yimbe ben yidirammi? Si mi faalano haa jooni yo yimbe ben yidan, mi laatotanooko kurkaadu Almasiihu on.

^a1.7 Dun ko Kibaaru Moyyo on.

Fii no Puulusa Fejjiniranaa Kibaaru Moyfyo on

¹¹ Mi andinii on, yo musibbe an, oo Kibaaru mo mi fejjinani on hinaa iwrudo e neddanke. ¹² Ko fii min mi hebiraali mo neddanke, awa kadi wonaa neddo jannimmi mo, kono ko Iisaa Almasiihu on tigi fejjinanimmi mo.

¹³ On naniino fii dee kuude an e saa'iiji goo wa fewndo ko mi woni ka diina *Yahuudiyanke, dun ko fewndo ko mi cukkii moftal Alla ngal haa feyyiti, mido lanca. ¹⁴ E nder kan diina Yahuudiyanke, hari mido buri goreebe an buy e hakkunde lenol an ngol, ko fii hari mido buri be himme tiidudo fii aadaaji baabiraabe amen ben. ¹⁵ Kono, nde Allaahu on, on Subinoodo lan gila ka teege yumma an, dun ko on Noddirdo lan moyfere mun nden, ¹⁶ o tawno no moyfi ka o fejjinanammi Biddo makko on fii no mi weebitirana mo be wonaa Yahuudiyanke ben, laatii mi landaaki hay gooto. ¹⁷ Kono e hoore dun mi yaaraali kisan *Yerusalaam fii yiidoygol e adiibe lan toddeede ben, kono mi yaari ka leydi Aarabu. Bawto dun mi yiltitii Damaasi.

¹⁸ Ko duubi tati bawto dun si mi yahi Yerusalaam fii yiidoygol e Petruusu. Mi woni ka makko don e nder balde sappoo e jowi. ¹⁹ Kono hari dun fow, mi yiidaali e sahaabaajo goo, si hinaa Yaaquuba, dun ko mijniraawo Joomi on. ²⁰ E nder koo ko mi woni on windande dun, e hino Alla no reeni, mi fena. ²¹ Bawto dun mi yahi e nder dee leyde Sirii e Silisii. ²² Kono hari mofte Almasiihu wonde e diiwal Yahuuda den yi'aali lan. ²³ Be naniino tun no wi'ee wonde: Oo cukkinoodo be oya tuma, no waajaade e ngal gomdinal ngal o faalanoo lancude. ²⁴ Jooni hibe mantude Alla fii an.

Fii Pottal Sahaabaabe ben Yerusalaam

2 ¹Duubi sappoo e nay bawto dun, mi yiltitii Yerusalaam, mi yiltodi e Barnabaasi e Tiituusa. ² Ko sabu fejjinaneede mi yiltitori ton. Mi holli be daaluyee Kibaaru Moyfyo mo mi fejjinani be wonaa Yahuudiyanke ben on. Mi fejjinani dun burbe

teddude ben e nder gundoo, fii wota taw ko mi gollunoo kon e ko mi woni gollude kon ko meere.³ Kono fii kala oo mo mi wondunoo ko mo lejol goo, dñun ko Tiituusa, oo *Gereekiyankeejoo, be wi'aano bee o *sunninee.⁴ Kono waditiibé musibbe men no suudinoo lombii hakkunde amen fii tefugol anda fii hettaare wonannde en e Iisaa Almasiihu on e faale maccindingol en.⁵ Kono men jabanaano be dñun hay nde wootere, men yankinanaaki be kadi, fii no goonga wondo e nder Kibaaru Moyyo on tabitira e mon.

⁶ Kono latii, bee wa'ube wa si ko burbe teddude, ko be wonnoo woo ko seeda hitti e an, bay Allaahu on hinaa dambe ndaarata, ben beydaano huunde e ko mi woni waajaade kon.⁷ Kono be ndaari be tawi ko mi halfiniraa daaluyee Kibaaru Moyyo on ko fii be sunninaaka ben, dun ko be wonaa Yahuudiyanke ben, wano Petruusu halfiniraa non Kibaaru Moyyo on fii sunninaabe ben, dun ko Yahuudiyankeebe ben.⁸ Ko fii ko on Alla huutordo Petruusu, wadi mo *sahaabaajo fii Yahuudiyankeebe ben, ko kanko kadi huutorimmi, wadimmi sahaabaajo fii be wonaa Yahuudiyanke ben.⁹ Nde tawnoo Yaaquuba e Petruusu e Yuuhanna, jogoraabe wa tugaale dental ngal, fellitii fii moyyere nde mi yedaa nden, be tamindiri juude amen jaame den, min e Barnabaasi, fii nabidal amen, fii yo menen men yaaru ka be wonaa Yahuudiyanke ben, kambe be yaara ka Yahuudiyankeebe ben.¹⁰ Be yamiri men kadi anditugol miskinbe ben, dun ko ko mi hebulanii wadugol.

Fii Yeddondiral hakkunde Puulusa e Petruusu

¹¹ Kono nde Petruusu arnoo Antioosi-Sirii mi feli mo e kene, sabu tawde ko o felniido.¹² Ko fii, ado yimbe be Yaaquuba immini goo arude, hari o jaamiday e be wonaa Yahuudiyanke ben, kono bay ben arii, o takkitii, o wonti feere, sabu kulol ben Yahuudiyankeebe gomdinbe, catii e sunninegol ben,¹³ haa dun woni sabu

beya Yahuudiyankeebé nembí mo kankó Petruusu e ngal faasiqyaagal, haa dún poodori hay Barnabaasi, o tawti bë e dún.

¹⁴Kono nde mi ndaarunoo, mi tawi bë alaa yaarude no feewiri e no yaadiri e goonga Kibaaru Moyyo on. Onsay mi holli Petruusu e tawnde fow dundoo, mi wi'i mo: «Si tawii an Yahuudiyankeeo on, a wa'ii wa mo wonaa Yahuudiyanke, a iwtii noone Yahuudiyanke, haray ko honno waawirtaa doolirde bë wonaa Yahuudiyanke'en jokkugol aadaaji Yahuudiyanke'en?»

¹⁵Menen non, ko men jibinanne Yahuudiyanke, wonaa men bë diya leyfyi junuubankeeji, ¹⁶kono men faamii wonde goddo jogortaake feewudo sabu doftagol Sariya on, kono ko sabu gomdingol Iisaa Almasiihu on. Ko dun wadi si menen kadi men gomdinii Iisaa Almasiihu on, fii yo men jogore feewube sabu gomdinal ngal gomdinden Iisaa Almasiihu on ngal, hara hinaa sabu doftagol Sariya on. Ko fii hay gooto jogortaake feewudo sabu doftagol Sariya on.

¹⁷Si tawii, e nder ko dabbeten jogoreede feewube kon sabu humondiral e *Almasiihu on, haray bangii wonde enen kadi ko en junuubankeebe, taw si dun no firi wonde Almasiihu on no wonani junuubu? Oo'o! ¹⁸Si mi wonii e mahitugol ko mi libunoo kon, haray min tigi mi hollii ko mi bondo. ¹⁹E telen-ma Sariya on, ko mi maydo ka banje Sariya fii no mi wuuirana Allaahu on. ²⁰Jooni mi fempidaama e Almasiihu on. Hinaa min tigi wuuri jooni, kono ko Almasiihu on wuuri e an. Dan ngurndan dan mi wuuri jooni ka bandu, mido wuuiriri gomdingol *Biddo Alla on, on Yidudo lan, itti hoore mun sadaka fii an. ²¹Min mi bugitotaako moyere Alla nden, ko fii si tawiino peewal ko Sariya heborta, harayno Almasiihu on ko meere maayani.

Fii Sariya e Gomdinal

3 ¹Ko onon yo bë Galaasi njofoobe, ko hombo mbildori on nii, onon bëe banginanaabe ko laabi poy fempegol Iisaa Almasiihu on? ²Jooni ko dundoo tun mi

faalaa andude e mon: hara ko sabu wadugol ko Sariya on yamiri kon hebirdon Ruuhu Allaahu on, kaa ko gomdingol ko hedidon kon? ³E jaa ko nii njofidirdon? E on fuddor Ruuhu Allaahu on, gaynitoron jooni wakkilaare bandu? ⁴E hara kon ko tampunodon fow wonay meere? Mido tanyinii wonataa meere! ⁵E hara oo Wondo wadude dii kaawakeeji moyi e hakkunde mon, dun ko on Yedudo on Ruuhu mun on, ko woni di wadirde ko fii hidon wadude ko Sariya on yamiri on kon, kaa ko fii hidon hedorde gomdinal?

⁶Ko fii no windii wonde: «Ibraahiima gomdini Alla, ngal gomdinal makko jogoranaa mo peewal.»^{b7} Awa faamee wonde, gomdinbe ben ko bibbe Ibraahiima. ⁸Awa kadi bindi din no wi'i wonde Alla jogitoroyay be wonaa Yahuudiyanke ben feewube sabu gomdinal ngal, dun ko ka Allaahu on adii fejjinde Kibaaru Moyyo on e Ibraahiima don, o daali: «Leyyi din fow barkinte sabu maa.»^{c9} Ko dun wadi ben gomdinbe barkindinte e Ibraahiima, on gomdinoodo.

¹⁰Kala ben hoolorbe Sariya on, haray ko e nder kuddi be woni, ko fii no windii: «Kuddi no e hoore kala on mo tabitaali e huutorgol ko windii kon fow ka nder deftere Sariya.»^{d11} E hoore dun, no laabi poy wonde hay gooto jogortaake feewudo sabu Sariya on yeeso Alla, ko fii no windii: «Feewudo on wuuriray gomdinal ngal.»^{d12} Awa Sariya on hottaaki gomdinal. Ko fii no windii wonde: «Kala doftiido dee yamirooje, o wuuriray de.»^{e13} Ko e nder ko kuddi ndin wontani *Almasiihu on fii men kon, o sotti en e ley kuddi Sariya on, ko fii no windii: «Kuddi wonanii kala on wengaado e leggal»,^{f14} dun ko fii no barki Ibraahiima hewtira leyyi din fow

^b3.6 Fud. 15.6

^c3.8 Fud. 12.3, 18.18, 22.18

^d3.10 Yaj. 27.26

^d3.11 Hab. 2.4

^e3.12 Lew. 18.5

^f3.13 Yaj. 21.23

sabu Iisaa Almasiihu on, e hara kadi en hendorto fodaari Ruuhu Allaahu on gomdinal ngal.

Fii Sariya on e Fodaari ndin

¹⁵ Musibbe, mido yettude misal e hoore men. Si goddo aru e wasiyaade, kala ko o wasiyii, hay gooto waawataa firtude dun maa beydita godfun e hoore dun.

¹⁶ Kono fodaariiji din ko e hoore Ibraahima e jurriya mun on woni. Kanko Alla o wi'aali «jurriyaaji din», wa si tawii ko di buy, kono ko gooto o wi'i «jurriya maa on»,^gdun-le ko Almasiihu on. ¹⁷ E hino ko mi woni wi'ude kon: Sariya ardo duubi teemedde nay e cappande tati gaanin *ahadi ndi Allaahu on wadunoo ndin waawataa firtude maa mehindina ndin fodaari. ¹⁸ Ko fii si tawno ndondi ndin ko ka Sariya iwri, haray ndi fawaaki e fodaari. Kono ko sabu fodaari ndin Allaahu on yediri Ibraahima ndin ndondi.

¹⁹ Jooni ko sabu hondun addi Sariya on? Ko sabu geddi addi Sariya on, haa nde on jurriya fodaado ari. Ko malaa'ikaabe ben fejnini Sariya on, kono be rewi e hakkundeejo. ²⁰ Hakkundeejo non wonaa sengo wooto wonirta, Alla-le ko gooto.

²¹ Dun haray Sariya on ko liddiido fodaariiji Alla din? Kono hinaa non! Si tawii sariya on ko gasoowo wurnude addanoo, harayno peewal ngal ko e makko iwaynood. ²² Ko dun wadi si bindi din wi'i fow no sokaa e ley junuubi, fii no fodaari ndin yediree gomdinbe ben sabu ko be gomdini Iisaa Almasiihu on kon.

Fii Gomdinal ngal e Ronugol Fodaariiji din

²³ Ado gomdinal ngal arude, hari hidéen sokii e ley joge Sariya on, haa ngal gomdinal araynoongal feeja. ²⁴ Hari Sariya on ko ngaynaako men fii ko ardoo en e Almasiihu on, fii no jogoreden feewube sabu gomdinal ngal. ²⁵ Bay ngal gomdinal arii, en alaa e ley kongol on ngaynaako han kadi.

^g3.16 Fud. 12.7, 12.15, 24.7

²⁶ Ko fii on fow ko on bibbe Alla sabu gomdinal ngal gomdindon Iisaa Almasiihu on ngal. ²⁷ Onon *lootaabe maande kisiyee e nder humondiral e Almasiihu on ben fow, on bornike Almasiihu on. ²⁸ Yahuudiyankeejo maa *Gereekiyankeejo, maa maccudo maa dimo, maa debbo maa gorko, alaa hande kadi. Ko fii on fow ko on gooto e nder humondiral mon e Iisaa Almasiihu on. ²⁹ Awa-le si tawii hidon humondiri e Almasiihu on, haray ko on jurriya Ibraahiima, ronoobe fodaari ndin.

4 ¹ Ko mi woni wi'ude: fannin ronoowo on ko paykun, haray alaa fus ko o serti e maccudo. Fii kala ko kanko jeyi fow, ² haray hikun e ley kongol ne'oobe kun ben e fewjanoobe kun ben, haa e saa'i mo ben makkun happy on timma. ³ Enen kadi wano non, wa fewndo ko wonder faybe, hari ko en maccube dii mbawdiji adunayankeeji. ⁴ Kono bay saa'i on hewtii, Allaahu on adduno Biddo makko on, on mo debbo jibini, jibinaado e ley Sariya on, ⁵ fii sottugol ben wonbe e ley Sariya on fii no jogoreden wa bibbe. ⁶ Bay ko en bibbe, Alla addii ka berde men Ruuhu Biddo makko on, dun ko on Ruuhu wondo ewnaade «Abba» e maana Baaba. ⁷ Dun haray hinaa a maccudo hande kadi, kono ko a biddo. Si tawii-le ko a biddo, haray ko a ronoowo immorde e Alla.

Fii Annde Puulusa nden fii be Galaasi ben

⁸ Wa fewndo ko on andaa Alla, hari ko on maccube sanamuaji di tawata wonaa godsun tigi e oo aduna. ⁹ Jooni non on andii Alla, e tentinii non jooni ko on be Alla andi, ko honno non yiltitordon e dii mbawdiji mehi lo'udi? E hara on faalaa de maccindinanaade kadi? ¹⁰ Hidon hittina fii jalaade den e lebbi din e saa'iiji din e duubi din. ¹¹ Mido huli fii mon, wota taw koo ko mi yanganii on ko meere.

¹² Musibbe an, wa'ee wa an min, ko fii min mido wa'i wa mon, yandi mi jeejii on! Ko fii on bonaaki e an. ¹³ Hidon maanditii ka aranun ko sabu nawnaare an mi hebiri feere fejjinangol on Kibaaru Moyyo on. ¹⁴ Hidon waawunoo non ronkude teddingol lan maa bugitoo lan sabu nawu an ngun, kono on wadaali dun! Ka liddu

dun, on tol nirno lan wa malaa'ikaajo Alla maa wa Iisaa Almasiihu on tigi.¹⁵ Ko honto weltaare mon nden woni jooni? Ko fii mido seeditanaade on dundoo: si no gasaynoo, on borayno gite mon den, wattanon mi.¹⁶ Haray e nder ko mi yeetotoo on goonga kon, mi wonii gano mon?

¹⁷ Awa himme mo be joganii on on hinaa moyyo, ko be faalaabe sortude on e amen, fii no tawtiron be.¹⁸ No moyyi ka goddo heba himme moyyo saa'i woo, hara hinaa si mido hakkunde mon tun.¹⁹ Faybe an, mido joganii on kadi muuseendi njata haa wa'on wa *Almasiihu on.²⁰ Mido faalaa wondude e mon jooni, mi yewtira on noone goo, ko fii mido aanani on.

Fii Maccangaaku e Ndimankaaku

²¹ Andinee lan, onon bee faalaabe wonude e ley Sariya on, si on faamaali ko Sariya on wi'i kon.²² Ko fii no windii, Ibraahiima no mari bibbe dido: goddo on ko mo kordo jibinani mo on, oya on ko mo dimo on jibinani mo on.²³ Mo kordo on, ko jibiniraado faale bandu, kono mo debbo dimo on, ko jibiniraado fodaari ndin.

²⁴ Dun ko misal nii: rewbe ben dido, ko ahadiiji din didi, *ahadi goo ko ndi Fello *Sinaayi ndin, bibbe mayri ben ko maccube, dun ko Haajirata.²⁵ Ko ngon Fello Sinaayi wongo ka leydi Aarabu woni Haajirata, hingo wa'i wa saare Yerusalaam handeere nden, bay hinde e nder maccangaaku, kayre e bibbe mayre on.²⁶ Kono saare Yerusalaam dow-dowre nden ko dimo on, ko on woni yumma men Saarata.

²⁷ Ko fii no windii:

«Welto yo an mo jibintaa, an mo jiidotaako!

Sowtu weltaare, ewnodaa, dun ko an mo andaali muuseendi njata!

Ko fii ko bibbe on wuldaado

burata duudude edii on debbo wondudo e moodi on.»^h

^h4.27 Isa. 54.1

²⁸ Ko fii, yo musibbe, onon kadi ko on bibbe fodaari ndin, wano *Issaaqa non.

²⁹ Awa kadi, ko wano ko feyfuno kon, on hebiranoodo faale bandu, bittinayno on hebiraado Ruuhu, ko dun fewndii kadi jooni. ³⁰ Ko hondun bindi din wi'i? Ko: «Rado kordo on e biddo mun on, ko fii biddo kordo on ronidataa e mo debbo dimo on jibini on.»¹³¹ Ko wano non yo musibbe, hinaa en bibbe kordo on, kono ko en 6e debbo dimo on.

Fii Ndimankaaku Men Sabu Almasiihu on

5 ¹ Ko fii no woniren rindinaabe wadi si *Almasiihu on rindini en. Awa wonee tabitube, wota on yiltitu hoore mon kadi e ley boggol maccangaaku.

² Ko dun wadi, min Puulusa, mi wi'ay on wonde si on etike fii yo on sunnine, haray Almasiihu on nafataa on huunde. ³ Awa mi fellintinanay kala neddo kadi wonde si etike haa sunninaama, haray himo haani jokkude Sariya on fow. ⁴ Onon bee wonbe dabbude no jogitoree feewube ka Sariya, on seedii e Almasiihu on, awa kadi on woddondirii e moyyere Alla nden. ⁵ Kono enen, tama'u men on ko jogoreede feewube yeeso Alla sabu gomdinal men ngal. Ko tippude e Ruuhu on sabbiden on tama'u. ⁶ Ko fii, ko hitti e wonbe e Iisaa Almasiihu on ben kon hinaa *sunninegol maa angal sunninelgol, kono ko gomdinal fejjiniroowal hoore mun giggol.

⁷ Ko fii hari hidon dogude moyya. Ko hombo non darni on haa hadi on doftagol goonga on? ⁸ Awa nden fewjoore don hinaa e Noddudo on on iwri. ⁹ Ko fii lewen seeda tun yurinay farin jiibaado. ¹⁰ Min non mido joganii on ndee hoolaare doo e fee Joomiraado on wonde, on mijotaako godsdun goo. Kono on wondo jiibude on, dun non ko wondo woo, o rondoyto jaawoore nden. ¹¹ E min non yo musibbe, si mido waajaade fii nafa sunninelgol, haray ko fii hondun kadi mi cukkantee? Si tawno haa jooni waaju an ngun no humii e sunninelgol, haray fempeede Iisaa

¹4.30 Fud. 21.10

Almasiihu on ka hoore *leggal altindiraangal accii wonangol yimbe ben peggal.

¹² Yo ben wonbe sonjude on bujito haa daata!

Fii Wuurirgol Ruuhu Allaahu on maa Mbeleede Bandu

¹³ Musibbe, jooni on noddaama ka ndimankaaku. Wota on baaror ngun ndimankaaku mon fii wadugol mbeleede bandu, kono kurkondiranee e nder giggol. ¹⁴ Ko fii Sariya on fow no timmi e nder aaya gooto, e hino mo: «Yo a yidir nokondo maa on wano yidirdaa hoore maa non.»^{j15} Kono si on ɣatindirii, on seekindirii wa kulle den, awa reenee wota on mulindir.

¹⁶ Ko d'un si mi wi'ay on: wuuriree Ruuhu Allaahu on, d'un on jokkataa himmeeji bandu. ¹⁷ Ko fii himmeeji bandu no liddondiri e Ruuhu Allaahu on, on *Ruuhu Seniido kadi no liddondiri e himmeeji bandu, ko di lurrudi kanji didi, fii wota on wadu ko faaladon woo. ¹⁸ Kono si Ruuhu Seniido on ardike on, haray hinaa e ley Sariya on wondon. ¹⁹ Ko fii mbeleede bandu den no waalii e kene, den-le ko jinaa e angal laabal e jiibaare ²⁰ e rewugol sanamu e mbileyaagal e ngayngu e yeddondiral e nawliigu e monee e haasidi e sendondiral e fedde-fedde ²¹ e ngajaneendi e mandilugol e *fasaadu e ko nandi e mun. Mido hadude on, wano mi hadirnoo on non wonde, ben wuuirbe nii heboytaa gebal ka *laamu Alla.

²² Kono ko Ruuhu Allaahu on funtinta kon, ko giggol e weltaare e buttu e mujal e yurmeende e moyuki e sella-finneyaagal ²³ e newaare e waawugol hoore mun. Sariya hadaali sifa din piiji. ²⁴ Wonbe e Iisaa Almasiihu on ben fempii bandu mun ndun wondude e himmeeji mun e faaleeji mun. ²⁵ Si tawii ko Ruuhu Seniido on wuuiriden, haray yaaden kadi e Ruuhu on. ²⁶ Wota en wonu mawnintiniibe, maa bagondiren, maa nawlindiren.

^j5.14 Lew. 19.18

Fii Tambondirgol, Huuwa ko Moyyí

6 ¹Musibbe, si goddo e mon aru e wadugol bonnere, haray onon, ɓe Ruuhu on ardi ɓen, wurtiree mo hakkil newiiki. Onon tigi reenodon, fii wota onon kadi on jarribe. ²Rondondiranee anndeeji mon din. Ko non timminirton Sariya *Almasiihu on. ³On mo no sikki ko o godfun, hara-le hinaa o huunde, haray o daynitike kanko tigi. ⁴Mo kala yo tasko kuude mun den tigi, o yi'anay hoore makko hara hinaa e beya, dun o anday no o mantora, ⁵ko fii mo kala no haani rondaade dongal mun ngal.

⁶Yo on wonaado janneede daaluyee on sendodu kala piiji moyyí e wondo mo jannude on.

⁷Wota on daynito, ko fii Alla yawitetaake, ko fii kala ko goddo sanki ko dun o wa'ata. ⁸Mo sankii mbeleede bandu wa'ay e mayru halakuyee, kono on sankudo faale Ruuhu on, o wa'ay e makko *ngurndan poomayankejan. ⁹Wota en haabu wadugol ko moyyí, ko fii en wa'oyay e saa'i haanudo si maayu bernde hebaali en. ¹⁰Ko dun wadi, fewndo ka weebani en don, wadanen yimbe ben fow ko moyyí, tentinii musibbe men ɓen ka gomfinal.

Rawnoode Batakuru Puulusa ndun

¹¹On yi'ii ittiri bindi njani di mi windirani on jungo an ngon din. ¹²Kala ɓen faalaabe wadude ko welata yimbe ɓen kon, ɓe karhay on fii *sunninegol, hara ko fii tun wota ɓe tampine sabu *leggal altindiraangal Almasiihu on. ¹³Ko fii hay kambe sunninaabe ɓen tigi ɓe jokkataa Sariya on, kono ko ɓe faalirtee yo on sunnine, ko fii no ɓe mantora e hoore mon. ¹⁴Min non hinaa non! Ko fii mi mantortaa huunde si hinaa leggal altindiraangal Iisaa Almasiihu Joomi men on. Sabu maggal aduna on maayii telen-ma an, min kadi mi maayii telen-ma aduna on. ¹⁵Awa hinaa sunninelogol maa angal sunninelogol hitti, kono ko ko Alla heydintini en kon hitti. ¹⁶Yo buttu e yurmeende wonan kala jokkudo ndee

ÉPÎTRE DE PAUL AUX GALATES - GALAASI

yamiroore, hay e *Isra'iila mo Alla.¹⁷ Ka heddii doo, wota hay gooto tampinan, ko fii battaate Iisaa den no ka bandu an.¹⁸ Yo moyyere Iisaa Almasiihu Joomi men on wonu e berde mon, yo musibbe. Aamiina!

ÉPÎTRE DE PAUL AUX GALATES

en Langue Pular (Fouta-Jalon)

République de Guinée

© 2013 Traducteurs Pionniers de la Bible

en collaboration avec

Mission Protestante Réformée